

# TUSI TAIALA

---

**MO LE PULEA MA LE VAAIA LELEI O I'A MA FIGOTA**

---

**O LE AFIOAGA O**

# VAILOA ALEIPATA

**(Tusia Aso 30 Aperila 1998)**

**SAUNIA:**

Pule mamalu a Alii ma Faipule ma tagatanuu o le Afioga o Vailoa Aleipata faatasi ai ma le lagolagosua a le Ofisa o Faigafaiva o le Matagaluega o Faatoaga ma Faigafaiva.

1	Upu Tomua	3
2	Faamatalaga e uiga i le Afioga	4
	2.1 Faamatalaga o foliga vaaia o le Afioga	4
	2.2 Faigafaiva	5
	2.3 Aotelega o Tulafono o Faigafaiva a le Afioga i Aso ua Mavae	5
3	O Ienei Fuafuaga Tatau	5
	3.1 Autu	5
	3.2 Tapenaga	6
4	Fuafuaga Faataitia	6
	4.1 Faamalosi Tulafono faalenuu: Taofia faigafaiva-le-talafeagai – fanai’a, ava niukini ma vaila’au oona	7
	4.2 Ia faasalalauina Tulafono a le Afioga	7
	4.3 Ia faasaina Upega ma Tili Matanini’i	8
	4.4 Ia faasaina ona toe lafoa’i lalisi i le sami	8
	4.5 Ia aoina mai i uta Alamea ma faatama’ia ai	9
	4.6 Ia faasaina Tu’iga ma Faamo’a	9
	4.7 Ia faasaoina ma faateleina Amu	10
	4.8 Ia iloiloina le saogalemu o Ogasami o Samoa mai meatau faaniukilia	10
	4.9 Ia taofia le faatauina o fugafuga ma isi olenei ituaiga i Maketi i fafo	10
	4.10 Iloiloina se ogasami talafeagai o le gataifale e faasoina	11
	4.11 Iloiloina le gataifale mo le tufaina atu o i’a ma figota e faafaatoagaina	11
	4.12 Ia una’ia faigafaiva i tua’au ma aoaoga mo faigafaiva	12
5	Talosaga a le Afioga	12
	5.1 Talosaga	12
6	Toe iloiloina o Ienei Fuafuaga Tatau	13

## 1. UPU TOMUA

O le faaititia o í'a ma figota i Samoa e afua mai i le anoanoai o mafuaaga eseese. O nisi o nei mafuaaga e aofia ai;

- le tanumia o vaega o le gataifale mo eleele-fou (fanua)
- le soona fagotaina faa-le-tatau o le gataifale e le afaifaiva
- faaogaina o faigafaiva-le-talafeagai
- ma aafiaga mai i afa malolosi (Ofa 1990, Val 1991, Heta 2004) ua tuanai.

O nei faafitauli o loo tulai mai pea i gataifale o si o tatou atunuu ma o loo avea lea ma auala e faaititia ai í'a ma figota. O le faaititia o í'a ma figota, o le lē maua foi lea e tagatanuu o porotini mai nei meaai sami. O se atugaluga tele lea i le Malo o Samoa na mafua ai ona faatino nisi o tulafono e pei ona faailoaina atu i lalo.

### **Tulafono Autu Tau Faigafaiva**

O le tausaga e 1988 na pasiaina ai e le Kapeneta le **Tulafono Autu Tau Faigafaiva** e faamalosi ai le (i) laiseneina o vaa-fagota mo fagotaga, (ii) faasaina le faia o faigafaiva-le-talafeagai i ogasami o Samoa. Peitai ane o nei tulafono uma e lei silafia e le toatele o tagatanuu o Samoa i ia vaitaimi. O se tasi o mafuaaga ona o le toaititi ma le toagaogao o le afaigaluega. Ae o se isi mafuaaga ua talitonu le taofi na faigata ona ausia ai lea tulaga ona e le'i iai se polokalame i lea vaitaimi e pei o le Polokalame o le Faasao o le Gataifale mo Nuu ma Afioaga. O leni polokalame e pei ona faatinoina nei, ua fesoasoani tele i le faa-malamalamaina mo le silafia e le mamalu o le atunuu o ia tulaga.

### **Tulafono Faatonutonu mo le Laiti o í'a ma Figota**

I le tausaga 1995 na pasiaina ai e le Kapeneta le **Tulafono Faatonutonu e Faatapulaaina ai le Laiti o í'a ma Figota**. O leni tulafono na pasiaina ma le faamoemoe e tuu avanoa ma fesoasoani i le faasaoina o í'a ma figota ua tauau ina mou atu. O le faatapulaaina o le laiti o í'a ma figota e faataga mo le fagotaina ina ia ausia le lapopoa ina ia mafai ona tautuufua ma fanafanau e faatupulaia ai le faitau aofai o le tamaoaiga o le gataifale.

### **Tulafono Laiti**

O **Tulafono Laiti** a nuu ma afioaga ua amanaia e le Faamasinoga. O se tasi lea o auala ua tuu sa'o ai e le Malo le malosi i nuu ma afioaga e mafai ai ona o latou molia i le tulafono soo se tagata e le usitaia tulafono ua aiaia i totonu o le Tusi Taiala a le afioaga o Vailoa Aleipata. O nei tulafono o loo i lalo o le vaega o Tulafono ma Faasalaga o le Tusi Taiala aua le pulea tatau ma le vaia lelei o le gataifale i tulaga o ona tamaoaiga ma lona siosiomaga mo se lumanai manuia. O tulafono laiti e soalaupuleina ma autasi iai le Pule Mamalu a Alii ma Faipule o afioaga taitasi.

### **Tala'aga : Polokalame o le Faasao o le Gataifale i Alalafaga ma Afioaga**

O le Polokalame o le Faasao na amataina e le Ofisa o Faigafaiva i le tausaga e 1995. I le amataga mai la o leni polokalame sa lagolagoina malosi e le Malo o Ausetalia e auala ma i lana AusAID i le faa-tupeina mo le 5 tausaga seia oo mai i le tausaga e 2000 ma faamuta ai loa lana fesoasoani. I lea lava tausaga, sa tauaveina mai ai loa e le Malo o Samoa le faatupeina o leni polokalame taua. O le talitonuga ma le faamoemoe autu o le tele o nei afioaga o le silasila lea i le lumanai manuia mo tagata lautele o le afioaga aemaise ai o tupulaga lalovaa.

O le polokalame o le Faasao e galulue soosoo-tauau ai le ofisa ma afioaga taitasi i nisi o fuafuaga faataatitia auā se lumanai manuia aemaise o le toe faa-tamoaigaina o le gataifale. I le amataina o leni polokalame e faatinoina ai ni faatalatalanoaga ma vaega eseese o le nuu e pei o le vasega o matai, tina ma aumaga. O nei fefaasoaiga e faailoa mai ai faafitauli o loo faafeagai ma le gataifale o le afioaga. E talanoaina foi aafiaga ma mafuaaga o nei faafitauli ma soalaupule ai ni fofo. Sa soalaupuleina loa e Alii ma Faipule, tagatanuu o le afioaga ma le ofisa nisi o fuafuaga faataatitia e foia ai nei faafitauli. O se faataitaiga o se fuafuaga faataatia a le afioaga i leni polokalame o le faia lea o se ogasami faasao e faasa ona solia, kolosiina pe fagotaina foi.

O nisi o fuafuaga faataatitia e tele ona faaogaina e afioaga mo le pulea ma le vaia lelei o tamaoaiga (i'a ma figota) o le gataifale e aofia ai le faasaina o;

- vailaau oona
- fanaia
- ava-niu-kini
- tuiga, faamoa, seuga
- le fagotaina o i'a ma figota laiti
- upega ma tili mataninii
- lama moli-uila i po

O nisi o fuafuaga o Tusi Taiala i le tele o afioaga mo le pulea tatau ma le vaia lelei o le siosiomaga o le gataifale e aofia ai le;

- aoina o alamea (crown-of-thorn starfish)
- faasaina o le lauina o le oneone o matafaga
- faasaina le lafoai o lapisi i le gataifale (matafaga)

O lenei polokalame e taua tele mo le lumanai manuia o Samoa ma ona tagatanuu. O le faaleleia o le siosiomaga ma le faatuputupulaia o le tamaoaiga o le gataifale o se faamoemoe e talitonu e mafai ona faatinoina i o tatou lava lima. E faa-tauaina tele le lagolagosua a le Pule ma le Faamalumaluga a Alii ma Faipule o afioaga i lenei polokalame.

## **2. FAAMATALAGA E UIGA I LE AFIOAGA**

### **2.1 Faamatalaga o foliga vaia faa-natura o le Afioaga**

Faitau aofai o tagatanuu o le Alalafaga	400 - 500
Aofa'i o aoga i totonu o Vailoa Aleipata	Aoga Faata'ita'i Aoga Tulaga Lua
Tapuaiga i totonu o le afioaga	Ekalesia Metotisi
Umi o le A'au o le Afioaga pe a fuaina i mita	500 mita
O le mamao o le a'au mai le matafaga	800 mita
Loloto o vaega pito i loloto pe a pe le tai i le taimi nei	10 futu
Loloto o vaega pito i loloto pe a pe le tai ao lei afaina i afa talu ai	8 futu

### **2.1 Faigafaiva**

O le afioaga lenei o Vailoa Aleipata, e fai lava si toatele o ona tagata e faalagolago i le sami mo le tausiga o aiga, atinaeina o le afioaga aemaise o le tua iai mo faalavelave ma mea faa-le-lotu. Ua maitauina ai, le faitau

aofai o tane e fagogota i le sili atu ma le tasi le aso o le vaiaso, e 40, ae o tina, ua faamauina e tai toa-luasefulu i le tolusefulu tina fagogota. E le gata i lea, ae e toatele foi i latou e fagogota i le tua'au mamao o e afioaga, ma ua faitauina, e le itiiti ifo i le sefululima tagata latou te fagogota i tua'au i le tasi le aso o le vaiaso. E tele nua paopao e faaogaina e tagata faifaiva; a le 50 e 60 paopao e fagogota i le vaiaso. Peitai e leai se alia fagotota e faafaigofie ai fagotaga a le afioaga, aemaise lava i tua'au. E fai alofa foi i isi uso-a-nuu tuaoi, ma e faatagaina ai i latou e fagogota i le aau ma le tua'au o le afioaga.

E tolu ni vaega taua o le siosiomaga mo faigafaiva a le afioaga o Vailoa, o ona togatogo, o amu, aemaise vaovao o le sami.

## 2.2 Ituaiga Faigafaiva ma I'a Maua

Ituaiga I'a/Figota	Faigafaiva	Taimi faaalu mo le tasi le tau'i'a ma ofu	
		Taimi nei	10 Tausaga ua tea
<b>I'a maua soo</b>			
1. Fugausi	Mata	Aso atoa	1 – 2 itula
2. Mataleele	Mata	Aso atoa	1 – 2 itula
3. Gatala	Mata, Matau	Aso atoa	1 – 2 itula
4. Lo	Lama, Mata	Aso atoa	1 – 2 itula
5. Tauleia	Lama, Mata	Aso atoa	1 – 2 itula
<b>Figota maua soo</b>			
1. Sea	Tui sea	4 – 5 itula	2 itula
2. Loli	Fai loli	5 – 6 itula	5 - 6 itula
3. Fugafuga	Fai fugafuga	4 - 5 itula	6 - 7 itula

## 2.3 Aotelega o Tulafono o faigafaiva a le afioaga i Aso ua Mavae

Ua au-tausaga o tuugutu ma tuutaliga tulafono a le afioaga o Vailoa Aleipata e faatatau i lona gataifale e ala i le faasaina o faigafaiva-le-talafeagai e iai:

- ♣ Fanai'a
- ♣ Ava Niukini
- ♣ Vaila'au oona

O nei tulafono uma ua mulimulitai ma limataitaiina ai tagatanuu uma o le afioaga seia pau mai i ona tua'oi. Sa mamalu tele le faasaina o nei ituaiga faigafaiva, ae peitai ua le o toe mamalu i nei vaitaimi, ona ua toatele nisi o afioaga tuaoi latou te le amana'aina, aemaise o le taulamua ai o tagatanuu lava o Vailoa Aleipata i le solia o nei tulafono. Ua aafia tele ai le siosiomaga o le gataifale o le afioaga ona o le fa'i o le leai o se lagolago mai le Malo, a'o nisi foi o le afioaga o loo omafaufau lava na o e taimi nei, ae le manatu i tupulaga ma le lumanai o fanau amuli.

O lea ua aumaia ai se ata manino mai le polokalame a le Ofisa o Faigafaiva e Pulea ma Va'aia lelei I'a ma Figota o le gataifale, ina ia faamalosi ma fautuaina tagata o le afioaga i itu nei. E le gafatia e le malosi faa-le-tulafono a le Malo ona malu puipuia le siosiomaga o le gataifale ma le tamaoaiga o le afioaga ma leai se lagolago a ona tagatanuu. Aua o loo taufaasoasoa le utiuti o tupe faaalu a le Malo mo atina'e eseese, ae le gata i lea o le toagaogao o le aufaigaluega e mafai ona faamalosi nei tulafono. Ma o le fofu talafeagai lelei lava o loo i aao lava o Alii ma Faipule ma tagatanuu o Vailoa.

## 3. O LENEI FUAFUAGA TATAU

### 3.1 Autu

E taua le fuafua lelei ma tulimata'i le sini autu o taumafai le mamalu o le afioaga e oo iai. O le faamoemoe maualuga o le Malo, ina ia faaleleia le soifua manuia o tagata o le afioaga ma ia faatupulaia atili mea taumafa mai le sami. O lea e manaomia ai le pulupululima o tagata uma o le afioaga i soo se faatininoga lelei e maua

ai lo latou tamaoiga. O le autu na talanoaina ma autasi iai finagalo uma o vaega taitasi i le taimi o faatalatalanoaga:

## **"Ina ia Puipuia le Siosiomaga o le Gataifale"**

### **"Toe faatupula'ia I'a ma Figota mo Tupulaga o le lumana'i"**

Na ioeina e le Komiti Faufautua mo le Vaa'ia lelei o I'a ma Figota a le afioaga i le fonotaga ma le ofisa i le Aso 31 o Mati 1998, le autu ua laugatasia uma iai finagalo o le afioaga ina ia faatinoina. O le Komiti foi lenei e nafa ma le tapenaina o tulafono aemaise vaega uma e fitoitonu ma le fuafuaga tatau. O lenei fuafuaga, ua faamoemoe ina ia oo atu i le tolu tausaga o loo faaogaina pea; ae afai e iai se suiga, e ao loa ona tagataga'i iai mo le toe talanoaina.

### **3.2 Tapenaga**

O le tapenaga atoa o le Tusi Taiala mai lava i le amataga seia oo ina pasia, sa faatautaia lava e aao o alii ma faipule aemaise tagatanuu o le afioaga o Vailoa Aleipata, ae tainane le lagolagosua a le ofisa o faigafaiva.

#### ***Feiloaiga Muamua :***

Na faafesootai e Apulu Sefo Fonoti le ofisa o faigafaiva i le 5 o Fepuari, 1998, ina ia auai le ofisa i le i sa latou uluai fonotaga ma le afioaga. O lea na faataunuuina ai le feiloai muamua i le 27 o Fepuari o le tausaga lava lea. O le aso tonu lea na taliaina aloai ai loa e le afioaga le polokalame ina ia faatuina i lo latou gataifale.

#### ***Vaevaeina i Vaega :***

O le isi fonotaga na sosoo ai, o vaevaeina lea i vaega taitasi e aofia ai le Vaega a Matai, Vaega a Tina, ma le Vaega a Aumaga. Sa faatalatalanoaina vaega taitasi ma sa 'auga manatu uma i le faafitauli o loo ogaoga lona tulai mai i le gataifale, ua faaititia i'a maua. Na talanoaina loa, aafiaga o faafitauli, fofo e fo'ia ai, aemaise o i latou i patino topnu iai le faatinoga o fofo o faafitauli.

#### ***Komiti Faufautua mo le Va'aia lelei o I'a ma Figota***

O le Komiti lea, o loo aofia ai sui mai vaega taitasi, ma o i latou ia e molia manatu o vaega a Matai , Tina ma Aumaga i totonu ole tapenaina o le taiala. Sa mafai ai loa ona latou tapenaina se ata faata'ita'i o le tusi taiala mo le pulea ma le vaaia lelei o i'a ma figota o le gataifale.

#### ***Tauaofiaga o le Fono Tele :***

O le aso 30 o Aperila, 1998 na usuia ai le fono mulimuli a le afioaga ma le ofisa o faigafaiva, ma pasiaina aloaia ai loa lenei fuafuaga tatau. O le tauaofiaga o lenei fono na faamautuina ai teuteuga uma mo le pulea ma le va'aia lelei o I'a ma Figota o le gataifale o le afioaga o Vailoa Aleipata.

## **4. FUAFUAGA FAATAATITIA**

O fuafuaga faataatitia o manatu faaalii o le afioaga e talanoaina ina ia mafai ona faia se suiga e toe faafoi ai le lelei sa masani ma ola ai le tamaoiga o le gataifale i le tausaga ua mavae. E lua (2) ituiga Fuafuaga Faataatitia; o le pitolaau a le Afioaga ma le pitolaau a le Ofisa o Faigafaiva. E tuuina mai e le afioaga tulafono ma taiala uma mo le pulea ma le vaaia lelei o le tamaoiga o le afioaga, ae lagolago atu iai le ofisa ma latou tapenaina faamatala e moomia e faalatele ai le malamalama o tagata i le polokalame. E le gata i le tapenaina o pepa o faamatalaga mo le malamalama lautele o le afioaga, ae saunia foi ni tautalaga mo le manino atili o tagata lautele.

## **4.1 Ina ia faamalositia tulafono faa-le-nuu e faasaina ai faigafaiva –le-talafeagai : Fanai'a, Ava Niu kini ma Vailaau Oona**

### **Otootoga**

Ua maitauina le tele o le faaletonu o le gataifale ma lona tamaoiga, e mafua mai i le ma'ale'ale ma le ogaoga o aafiaga o faigafaiva-le-talafeagai. O le faaaogaina o fanai'a, ava niu kini ma vailaau oona e pei o vaalaa'u ta-lavalava mo fagotaga, e moni e tele ia ma figota e maua ai, ae e taunuu ai le upu, "e tuai lava ae fai mai". Aua foi, o le a faatama'ia faatasi i'a lapopoa ma nai meaola ninii, faaleagaina ai amu o loo fai ma ofaga e sulufafi iai meaola o le sami mo so latou lafitaga, ae o le a mautinoa foi le gaogao sei'ia oo lava ina le toe maua ai ni i'a i lea ogasami. O le mea moni, o le a autausaga e faatalitali ai mo le toe tau faafoia o lea ogasami i lona lelei sa iai muamua.

### **Fuafuaga Faataatitia a le Afioga**

Talu ai ona o le tulaga pagatia ua iai le gataifale o Vailoa Aleipata e mafua mai i le faaaogaina o nei ituaiga faigafaiva, o lea na ae aise finagalo autasi i le komiti, ina ia toe faamalositia tulafono sa iai i aso ua mavae, e faasaina ai ona toe faaoga nei ituaiga faigafaiva. O le puipuiga ma le faamamaluina o nei tulafono, o le a i aao lava o le pule mamalu a alii ma faipule o Vailoa. O tulafono ma faasalaga uma lava ua ta'ua i lalo, ua faia ma faamautuina ina ia mafai ona utagia e tagata o le afioga ma soo se tagata e taofia ai le toe faaaogaina o faigafaiva-le-talafeagai.

### **Fautuaga**

Ia toe faamalositia tulafono e faasaina ai faigafaiva-le-talafeagai ona toe faatinoina i gataifale o Vailoa Aleipata.

### **Tulafono**

"Mo le mamalu o le atunuu atoa ma tagatanuu o le afioga o Vailoa Aleipata : Ua matua faasaina lava faigafaiva-le-talafeagai ona toe faatinoina i gataifale o le afioga".

### **Faasalaga**

O tagata o le afioga o Vailoa Aleipata e solia lena tulafono, e faasalaina i le \$250.00.

O tagata o le itumalo e le utagia mai lena tulafono, e faasalaina i le \$500.00 poo le molia sao i le Tulafono Autu Tau Faigafaiva a le Malo, faatasi ai ma tagata ese mai isi afioga o le atunuu. O le a faamamaluina lena Tulafono e amata atu i le aso 30 o Aperila, 1998.

### **Fuafuaga Faataatitia a le Ofisa o Faigafaiva**

O le a fesoasoani le ofisa i le tufaina atu o pepa o faamatalaga ma faamalamalama atili le ogaoga o aafiaga o nei faigafaiva i le afioga, aemaise o le polokalame o le faasao.

## **4.2 Ia faasalalauina Tulafono a le Afioga**

### **Otootoga**

O faasalalauina i le itio, televise ma nusipepa, o nisi ia o auala talafeagai e momoli atu ai se feau taua aemaise o le faalateleina o le silafia o tagata i tulafono uma ua pasia e le afioga ma le ofisa o faigafaiva. E tatau foi ona silafia e le atunuu le malu puipuia o le gataifale o Vailoa Aleipata.

### **Fuafuaga Faataatitia a le Afioga**

Ua tapenaina e le Komiti faasalalauina o Tulafono a le Afioga, e faamoemoe ia nofoilo ma malamalama uma iai soo se tagata o le atunuu.

### **Autu o le Faasalalauina**

"Puipuiga o le Gataifale o Vailoa Aleipata"

### **Fuafuaga Faataatitia a le Ofisa o Faigafaiva**

O tulafono uma a le afioga, e tatau ona sainia muamua e le Pule Sili o le Matagaluega o Faatoaga ma Faigafaiva ina ia mafai ona avea ma Tulafono Lagolago (by-laws). O le faasalalauina o nei Tulafono, o le a gafa lava ma le afioga.

## **4.3 Ia faasaina Upega ma Tili Mataninii**

### **Otootoga**

O upega ma tili matanini'i o loo faaogaina e le toatele o faifaiva o le atunuu, ua maitauina le tele o i'a laiti ua faatamai'a mai ai. E mautinoa le tulaga faaletonu o le tamaoaiga maua i le gataifale o le afioaga pe afai o le a faatupulaia pea le faaogaina o nei nei ituaiga metotia faa-faigafaiva. E le gata ina o le a faaitiiti i'a i le aau o le afioaga, ae o le a le maua so latou avanoa e oo atu ai lo latou lapopoa e tatau ai ona tautuufua mo nisi augatupulaga fou o le gataifale.

#### **Fuafuaga Faataatitia a le Afioaga**

Na faaalua e le komiti, ua maitauina le utiuti o i'a maua i le gataifale, ona o le so'ona fagotaina le tatau e ala i le faaogaina o upega ma tili mata ninii. Na latou ta'ua foi i la latou saunoaga, ua latou lagolagoina malosi le Tulafono Lagolago a le Ofisa o Faigafaiva ma le Malo, e faatapulaa ai mataupega ma tili e faaogaina.

#### **Fautuaga**

O le fautuaga na tuuina ina e le pule mamalu a alii ma faipule aemaise o le komiti, e faapea ua tasi moemoe le afioaga atoa ina ia tau fai pulupululima e lagolago le tulafono a le Malo ua maea pasiaina i le faaogaina o upega ma tili mata ninii.

#### **Tulafono**

"Ua matua faasaina soo se ituaiga upega poo se tili mata ninii ona toe fagotaina gataifale o le afioaga o Vailoa Aleipata".

#### **Faasalaga**

Mo tagata o le afioaga o Vailoa e solia lenei tulafono, o le a faasalaina i le \$200.00

O tagata mai isi afioaga o le itumalo o Aleipata, o le faasalaina i le \$300.00

O isi tagata lautele o le atunuu, faatasi ai ma i latou e le utagiaina lenei faasalalaga, o le a molia sao loa i le Tulafono Faatonutonu a le Ofisa o Faigafaiva ma le Malo.

#### **Fuafuaga Faataatitia a le Ofisa o Faigafaiva**

O se lagolagosua mai le Ofisa o Faigafaiva e ala i lana Polokalame fesoasoani, o le tuuina atu lea o o pepa o faamatalaga e saga faamautuina ma faamaopoopoina ai lenei tulafono.

### **4.4 Ia faasaina ona toe lafoai lapisi i le sami**

#### **Otootoga**

O le lafoai o lapisi ma otaota i le sami ma le vai, ua avea ma faapogai o le tele o namu e tautuufua ai, aemaise lava i lapisi e pei o uamea ma atigi apa. O le a tele faama'i e mapuna mai ai, ae le gata i lea o le faamanu'alia ai o nisi o faifaiva. O le isi itu, o le a le talafeagai ai lea nofoaga mo le ola lelei o i'a ma figota.

#### **Fuafuaga Faataatitia a le Afioaga**

O fuafuaga fai mamao ma le faasaoina o le soifua maloloina o le tagatanuu o le afioaga o Vailoa Aleipata. Na a'e ai se tofa i le pule mamalu a alii ma faipule o le afioaga ina i'a tofusua aiga uma o le afioaga, e eliina ni lua i tuamaota ma tualaoa e lafoai iai lapisi. ua talotonu le komiti, o le auala aupito sili lea ona filemu ma talafeagai mo le fo'iaina o lenei faafitauli. O le faatinoina o lenei fuafuaga o le a i aao lava o le pule mamalu a alii ma faipule.

#### **Tulafono**

"Ua matua faasaina lava soo se tagata o le afioaga aemaise i latou mai isi afioaga ona toe lafo'aiina lapisi e pei o pepa iila, uamea, atigi apa ma isi lava ituaiga lapisi i le sami o Vailoa Aleipata.

#### **Faasalaga**

O tagata o le afioaga e solia lenei tulafono, o le a faasalaina i le sala tupe e \$100.00

O tagata mai isi afioaga o le itumalo, o le a faasalaina i le sala tupe e \$200.00

O tagata ese mai isi afioaga, atoa ai ma i latou e le usitaia nei faasalaga, o le a molia sao i le Tualafono Laitiiti a le Afioaga.

#### **Fuafuaga Faataatitia a le Ofisa o Faigafaiva**

O faamatalaga eseese e faatatau i aafiaga o le siosiomaga o le gataifale ma lona tamaoaiga, lea o lea fesoasoani maalosi atu ai le ofisa i le faamalamalama faalauaitelina. O le pepa o faamatalaga ua saunia e le ofisa, o le a tufatufaina atu ma faalamalama i le afioaga, le lelei ma le taua o le teu maluina o lapisi i nofoaga talafeagai.



#### **4.5 Ia Aoina mai i uta Alamea ma faatama'ia ai Ootoga**

O le alamea, o se ituaiga o le aveau ma e nofo i luga o le aau. O lenei meaola, na te aina meaola ninii ua taua o polipe o loo tutupu mai ai amu. A oo ina faateleina lenei meaola, o le a latou faatama'iaina se vaega tele o le aau, ma o le a faaitiitia ai i'a ma figota maua i lea ogasami, aua o lea pagatia ma ogaoga aafiaga e tulai mai ai, aua e fai o le lepetia o amu, o le sulufaiga o le tele o meaola o le sami, ae o le a leai ni mea'ai e maua mo i latou. E le mafai ona faaumatia le alamea pe a vaevaeina lona tino i le sami. E mafai e nei itutino ona toe fgaatupuina mai le anoano o nisi alamea fou, sei vagana ua aumaia i uta i le pa'umatu e tanumia, susunu pe faamagoina foi lona tino i le la.

#### **Fuafuaga Faataatitia a le Afioga**

Ua faailoa mai e le afioga, o le alamea o se tasi o lea o faafitauli o le pepē oa amu o e gataifale. E le gata i le pepē ai o amu, ae aafia ai foi le soifua o tagata faifaiva, ma ua tuuina atu ai e le Komiti fautuaga i le afioga, e pei ona ta'ua i lalo.

#### **Fautuaga**

Ua fautuaina e le komiti le afioga, o le latou faatinoina se fonotaga, e iloa tonu ai se aso o le a aoina ai le alamea i le gataifale o Vailoa Aleipata. O lea gaoioga o le a nafa lava ma le Komiti.

#### **Fuafuaga Faataatitia a le Ofisa o Faigafaiva**

E leai se polokalame a le Malo e ua fuafua e totogoiina ai le aoina o le alamea, ae vagana ai se fesoasoani mai le ofisa o Faigafaiva i auala e talafeagai ma le tineia o lenei meaola faalafua, e ala atu i le faamalamalamaina o pepa o faamatalaga o le Alamea.

#### **4.6 Ia faasaina Tu'iga ma Faamo'a Ootoga**

O amu, o se mea-totino e lasi lona aoga ma le taua i meaola aemaise o le siosiomaga lautele o le gataifale. O se ofaga ma se sulufa'iga lelei mo i'a ma figota laiti. Afai ae faatama'iaina amu, o le a faaletonu foi le ola lelei o meaola o loo faalagolago iai. O tu'ia ma faamo'a, o se tasi lea o metotia faa-faifaiva e le telefeagai lona faaogaina. Afai ae faaauu pea ona faatinoina nei ituaiga faigafaiva, e mautinoa lava le faaitiitia poo le leai lava foi o se i'a e toe maua i nei ogasami.

#### **Fuafuaga Faataatitia a le Afioga**

A o faia fonotaga i vaega taitasi, na latou tau fai tofua manatu ma faaalua le ogaoga o aafiaga o nei ituaiga faigafaiva. Na faaalua foi le fausiaina o se tulafono a le afioga e faasaina le toe faaogaina o tu'iga ma faamo'a i gataifale o Vailoa Aleipata.

#### **Tulafono**

"Ua matua faasaina tu'iga ma faamo'a i gataifale o Vailoa Aleipata".

#### **Faasalaga**

O tagata o le afioga e solia lenei tulafono, o le a faasalaina i le \$100.00

O tagata mai isi afioga o le itumalo o Aleipata, o le a faasalaina i le \$200.00

O tagata lautele o le atunuu, faatasi ai ma i latou e le utagia nei faasalaga, o le a molia sao i le Tulafono a le Malo o Samoa.

#### **Fuafuaga Faataatitia a le Ofisa o Faigafaiva**

O le a fesoasoani tele le Ofisa i le faalauteleina ma le faamalosia o le tulafono a le afioga, i lalo o le Tulafono Autu Tau Faigafaiva a le Malo o Samoa. O le a tuuina atu foi pepa o faamatalaga ua saunia mo le lagolagoina o le taofia o nei faigafaiva, ma faamautuina soo se vaega e talafeagai ma le faasaina o amu.

#### **4.7 Ia faasaina ma faateleina Amu Ootoga**

O le puipuia ma le faasaina o amu, o se tasi o itu lelei ma le taua e tuuavana ma fesoasoani ai i amu e tutupu ma ola ina ia faateleina ai nisi amu. O le tele o amu i se ogasami, o le tele foi lene o i'a ma figota e aumau ai. O le faia o se ogasami faasaina ma taofia faigafaiva le talafeagai, o nisi ia o fuafuaga tatau ma le talafeagai mo le faateleina o amu.

### **Fuafuaga Faataatitia a le Afioaga**

Na faaalua e le komiti, o le faia o se ogasami faasao, o se auala mautinoa lava lea mo le toe faateleina o amu i lo latou gataifale. O le faatinoina o le fausia o se faasao, o le nafa lava ma le komiti ma le pule mamalu a alii ma faipule, ae o le mataituina mo le sologa lelei, o le a vaavaai tele e le afioaga atoa.

### **Fuafuaga Faataatitia a le Ofisa o Faigafaiva**

O le a fesoasoani le ofisa i le faamalamalamaina o itu lelei o le faasoina o amu ma tufaina atu ni pepa o faamatalaga e faalauiloa atili ai lenei mataupu.

## **4.8 Ia iloiloina le saogalemu o Ogasami o Samoa mai meatau faa-niu-kilia**

### **Otootoga**

O meatau faa-niu-kilia ma kasa oona o loo lafoai i le sami, ua mautinoa le ogaoga tele o aafiaga i i'a ma figota, ma le anoano o meaola o le alititai. E le gata i lea, ao o le afaina ai foi o le soifua lautele o le mamalu lautele o le atunuu. Ua iai le talitonuga, e tele atunuu o le Pasefika ua aafia ai, e iai Samoa.

### **Fuafuaga Faataatitia a le Afio'aga**

Na faaalua e le komiti, ua aafia tele le tamaoaiga o le gataifale o le afioaga ma le atunuu i le lafoa'ia o meatau faa-niu-kilia i le sami. Na faamatuu mai ai se talosaga a le afioaga agai i le Ofisa o Faigafaiva, ina ia fautuina le Malo e faatau le tetee atu i meatau faa-niu-kilia.

### **Fuafuaga Faataatitia a le Ofisa o Faigafaiva**

O le a lagolagoina e le Ofisa o Faigafaiva le fautuaga a le afioaga na faamatuu mai.

## **4.9 Ia taofia le faatauina o fugafuga ma isi ituaiga o lenei figota i Maketi i fafo**

### **Otootoga**

O figota e pei o fugafuga, mama'o ma isi ituaiga, o loo fagotaina ma faatau atu mo le fofoga taumafa o le mamalu o le atunuu. E faigofie ona fagotaina nei figota, ona e mau i nofoaga papa'u. Talu ai o le faigofie ona fagotaina o nei figota, ua iai se popolega e ono tula'i mai i le lumanai, o le faaititia lea o nei figota, pe afai o le a faaauauina pea ona fagotaina mo maketi i fafo. O lea ua moomia tele ai se tulafono e puipuia ai mai le soona fagotaina.

### **Fuafuaga Faataatitia a le Afioaga**

Na taua e le afioaga, o le naunau o tagata e fagotaina lenei figota o le naunau e faatau atu i maketi i fafo, o le a le gata i le soona fai, ae o le mea manino, o le a vave lava ona faaititia ai lo latou faitau aofa'i. O lea na tuuina mai ai e le komiti ni fautuaga e faasaina ai ona toe faatau atu nei figota mo maketi i fafo, ma ua faia ai loa se tulafono e faamautuina ai.

### **Tulafono**

"Mo le mamalu o le atunuu atoa aemaise le afioaga o Vailoa Aleipata, ua matua faasaina lava ona toe fagotaina fugafuga ma isi ituaiga o lenei figota i gataifale o le afioaga, ma faatauina atu i fafo".

### **Faasalaga**

Soo se tagata o le afioaga e solia lenei tulafono, o le a faasalaina i le \$100.00

O tagata mai isi afioaga o le itumalo o Aleipata, e faalailaina i le tai \$200.00

O tagata ese mai i le itumalo faatasi ai ma i latou e le usita'ia faasalaga ua ta'ua i luga, o le a molia sao loa i le Tulafono a le Malo.

### **Fuafuaga Faataatitia a le Ofisa o Faigafaiva**

O faamatalaga ma fautuaga mai le Ofisa o Faigafaiva e faatatau i olaga, ma auala talafeagai e fagotaina ai lenei figota, aemaise o le pulea tatau ma faamanuiaga e maua mai ai, o le a mafai ona tuuina atu e ala i se mana'oga faatalosaga.

## **4.10 Iloiloina se ogasami talafeagai o le gataifale e faasoina**

### **Otootoga**

O se vaega o le gataifale ua faasaoina, e le tatau ona toe fagotaina pe uia foi e se tagata poo se vaa fagtoa. O le a avea o se nofoaga e aafia ai le malu puipua o le siosiomaga ma ona tamaoaiga i i'a ma figota. O lenei nofoaga faasao o le a faasaoina ai amu, i'a, figota ma le auu, ina ia mafai e nei meaola ona oo atu lo latou lapopoa e maua ai le avanoa e tautuufua ma fanafanau ai. O le autu taua lava, o le a avea lenei faasao ma puna'aga o le tele o i'a ma figota, e mafai ai ona toe faaleleia nisi vaega o le gataifale ua afaina. O le a tautuufua ma fanafanau i'a ma figota o loo ola i le ogasami lea, ma o le a tafefea atu o latou fua fanau i ogasami ua le o toe maua ai ni i'a ma ni figota, ma faatupuina ai. O le a le pine ae manuia ai tatou aemaise tupulaga o lelumana'i.

### **Fuafuaga Faataatitia a le Afioga**

E ao i le afioga ona:

- ♣ Galulue soosoo tau'au ma le Ofisa o Faigafaiva i le faatinoga o galuega aemaise o iloiloga o le ogasami ua avea ma nofoaga ua faasaoina.
- ♣ Talanoaina ma auilili lipoti faavae o le ogasami faasao
- ♣ Faatinoina loa fuafuaga o le ogasami faasao
- ♣ Va'ai, tausia, pulea ma mataituina lelei le afioga atoa

### **Fuafuaga Faataatitia a le Ofisa o Faigafaiva**

O le a gafa le Ofisa o Faigafaiva ma le:

- ♣ Faatinoina iloiloga talafeagai uma o le ogasami faasao a le afioga
- ♣ Saunia soo se lipoti ma tuu atu aloa'ia i le komiti o le faasao a le afioga
- ♣ Tuuina atu fautuaga ma faamatalaga talafeagai uma mo le mataituina lelei o le faasao

## **4.11 Iloiloina le gataifale mo le tufaina atu o i'a ma Figota e faafaatoagaina**

### **Otootoga**

O le tufaina atu o i'a ma figota, e faamoemoe lea i le aumaia o i'a ma figota mai isi atunuu ma tufa atu i afioga ua mae'a iloiloina o latou ogasami faasao ma ua talafeagai lelei o meaola o le sami. Ae o le faa-faatoagaina, e mo ogasami e talafeagai lelei ma le ola o i'a ma figota ua sauni e tausia. O le tufaina atu o figota ina ia tausia ma faaolaina i ogasami o afioga ma alalafaga taitasi, e ao ai i le afioga atoa ona filiga, pulupulu lima ma galulue faatasi ina ia ausia se taunu'uga lelei.

Sa faaalua e le afioga, o le tele o figota ma i'a sa maua i lo latou gataifale i tausaga ua mavae, peitai, ua pei o le emo o le mata le mou ese atu. Ua mautinoa lava le tele o figota ua le o toe va'aia i le taimi nei, ua tuufesilisili manatu ma mafaufau, ailoga e toe maua mai. O lea ua talosagaina ai le ofisa ina ia mafai ona maua atu nisi figota e faa-faatoagaina ma tausia i o latou ogasami faasao.

### **Fuafuaga Faataatitia a le Afioga**

E ai i le afioga ona

- ♣ Galulue soosootau'au ma le Ofisa o Faigafaiva e faatinoina iloiloga ma suesuega, pe talafeagai le gataifale Vailoa Aleipata mo le tausia ma le faa-faatoagaina o i'a ma figota.
- ♣ Auililiina lipoti i suesuega o le gataifale, ma ia faia se faaiuga i le faatinoina o atina'e i totonu o Vailoa Aleipata.
- ♣ Galulue faatasi mo le puipua o nei atinae, ma va'aia tagata o loo latou faatama'ia ma solia tulafono e faatatau i nei atina'e.

### **Fuafuaga Faataatitia a le Ofisa o Faigafaiva**

O le a oo atu ni alii ma tama'itai ofisa mai le vaega suesue, ma suesueina le vaega o le gataifale o le afioga, ina ia faamaonia le talafeagai mo le faaolaina ai o ni figota. O le a mafai ona tuuina atu ni figota pe afai o le a faamaonia le talafeagai o nei nofoaga mo ia atina'e.

Afai ae faataunuuna leni fuafuaga ona:

- ♣ Fesoasoani mai lea o le Ofisa o Faigafaiva e ala i le va'aia ma le mataituina o le sologa lelei o le tuputupu a'e o figota ua atina'eina.
- ♣ Saunia ni aoaoga mo le faamalamalamaina o olaga faanatura o nei figota.

## **4.12 Ia una'ia Faigafaiva i tua'au ma aoaoga mo Faigafaiva**

## **Otootoga**

E mafai ona faaleleia le tamaoaga o í'a ma figota maua i aloalo, a'au ma ogsami o le gataifale ua faaleagaina, pe afai ae faaititia le fagotaina o nei ogsami. O se tasi auala e faaleleia ai le tamaoaga o le gataifale, o le fagotaina lea o ogsami o le gataifale e le'i fagotaina lava, aemaise i tu'au mamao.

### **Fuafuaga Faataatitia a le Afioaga**

Ua iai le talitonuga o le komiti, e ao ona una'ia ma faamalositia faigafaiva i tuā'au ma ā'au mamao ina ia tuumamaina ai le fagotaina o í'a ma figota o le a'au ma le aloalo. Ua le gata foi i lea, ae o le a mafai ai ona toe faatupula'ia ma faaleleia le tamaoaga o le tele o ogsami o le gataifale, aemaise i le aloalo ua faaleagaina. Ua talosagaina foi le Ofisa o Faigafaiva ina ia faatinoina se aoaoga i auala tau faigafaiva e aoaoina ai le autautai o le nuu. O la latou talosaga, ia faatautaia e se alii Ofisa o Faigafaiva ua iai se agavaa ma se tomai faapitoa i mea tau faigafaiva.

### **Fuafuaga Faataatitia a le Ofisa o Faigafaiva**

Talu ai ona o le tele o afioaga ma alalafaga e leai ni va talafeagai mo fagotaga i tuā'au, o lea ua taumafai ai le Ofisa o Faigafaiva e saili fesoasoani ina ia maua ni vaa e talafeagai mo lea faamoemoe. O le a iloilo ina foi e le Ofisa manaoga i auala tau faigafaiva e ao ona fesoasoani ai e aoaoga le mamalu o le autautai o afioaga taitasi. O itu tāua o le a aafia i nei aoaoga, e pei o le teuina ma le va'aia lelei o í'a, saogalemu i luga o le sami, tausiga o afi o vaa, faasuina o í'a ma isi lava mataupu taua.

### **Faamatalaga Faaopoopo**

**Vaa mo Fagotaga i Tua'au:** O le leai o ni vaa talafeagai mo fagotaga i tua'au, o le auala lea ua avea ma vaegase i le una'ia o faigafaiva i tua'au. E leai se vaa fagota e i lae va o le alia ma le paopao, ma o se vaa i lea va ua talitonuina e talafeagai mo fagotaga i tua'au. Ia sailiiliga a le Ofisa o Faigafaiva i se vaa talafeagai, ua filifilia ai se vaa e i le va o le 14 – 16 futu, o lona tau e \$9,800 tuufaatasi iai ma lona afi (15HP) ma nai mea fagota, o le taula, ofu faaola mo le saogalemu i luga o le sami, ma foe. O loo iai se fesoasoani a le faalapotopotoga a le Iuni a Europa (EU) mo le faatupeina o le 65% o le tau atoa o le vaa (\$9,800), o le 35%, o le sao lea a le afioaga poo le faalapotopotoga ua auai i le Polokalame a le Ofisa o Faigafaiva.

O leni ituaiga vaa, e mafai ona faa'auvaaina e ni tagata se toalua pe toatolu foi, ma e faaogaina leni vaa i faigafaiva i tua'au. O le a faia soi ni aoaoga mole saogalemu i luga o le sami, teuina ma le va'aia lelei o í'a, tausiga o vaa, atoa ai ma le va'aiga o mea fagota.

## **5. TALOSAGA A LE AFIOAGA**

### **5.1 Talosaga**

O le taimi ao faia faatalatalanoaga i Vaega e Tolu, sa faamatuu mai ai talosaga a Vaega eseese o le afioaga i ni itu ma ni manaoga o loo moomia i lo latou gataifale. O talosaga uma sa tuuina mai, sa faamautuina uma e le komiti i la latou fonotaga ma le ofisa. O le a gafa le Ofisa o Faigafaiva ma le iloilo ina o nei talosaga. O talosaga uma sa tuuina mai, o loo ta'ua i lalo:

- ♣ Faisua
- ♣ Tilapia
- ♣ Ogasami Faasaoina
- ♣ Vaa Fagota (2)

## **6. TOE ILOILOINA O LENEI FUAFUAGA TATAU**

### **Otootoga**

O le toe iloilo ina o leni fuafuaga tatau, o le vaaia ma le tausia lelei o í'a ma figota a le afioaga mo le sologa lelei pea aua le agai iluma, o le a fai ma galuega tumau a le Komiti o le Faasao ma le Ofisa o Faigafaiva. O leni iloilo e su'esu'eina ai pe iai se 'ai o le faasao, pe o maua ai se faamanuiaga mo le afioaga. E le gata i lea, e suesueina foi pe iai ni suiga o le komiti, pe iai foi ni tulafono ua solia e nisi o le afioaga, poo tagata mai isi afioaga, aemaise se auililiga maumaututu i le tulai mai o galuega faatino a le afioaga. E fesiligia ai foi le auunaga a le Ofisa o Faigafaiva poo faataunuu uma tautinoga ma fuafuaga faataatitia ua ta'ua i luga. O leni foi iloilo e lipotia ai le alualu lelei ae poo a foi ni faaletonu o alia'e mai talu ona amataina le polokalame.

### **Fuafuaga Faataatitia a le Afioaga ma le Ofisa o Faigafaiva**

Ua iai le maliliega a le Afioga ma le Ofisa o Faigafaiva, o le a toe auiliiliina leni fuafuaga tatau pe a maea le ono masina talu ona pasia leni Tusi Taiala i le Fono Tele. O le a toe feutaga'i ai le Komiti ma le Ofisa i se aso o le a atofaina pe a atoa le ono masina.